

Minister Benny Sevinger ta felicita famia de Freitas y amigonan di Flor de Oriente

Cu apertura di Plenchi Juan Portugues



ORANJESTAD(AAN): Diadomingo merdia, Minister di Infraestructura Benny Sevinger a compaña Minister President Mike Eman na ceremonia di desvelo di borchí cu for di awor padilanti ta nombra e Plenchi dilanti di Flor de Oriente na Playa 'Plenchi Juan Portugues'.

Esaki tabata un momento masha special pa e mandatario, kende manerá ta conoci ta representa e bario di Rancho, Madiki y bisindario. Durante e ceremonia, Minister Sevinger a hiba palabra indicando cu na ningun momento tabatin duda entre e y su coleganan pa aproba e peticion pa e Plenchi haya number como homenahe na Sr. Joao de Freitas.

"Conseho di ministronan no a duda di vota pro e peticion aki dedica na papa di Pepi cu pa hopi aña a traha na Flor de Oriente y tur hende di bario conoce," Minister Sevinger a bisa. El a splica tambe cu den cuadro di renobacion di nos pais y nos ciudad, nos tur

ta para dilanti di un cambio. Ta asina cu den proyecto di renobacion di edificio di Corte y su anexo moderno, a probecha pa cambia e infraestructura rond di dje y a crea e Plenchi aki.

"Tabatin varios motibo," Minister Sevinger a bisa. "Un ta pa e fluho di trafico ta diferente, dos pa siguridad di tur cu ta den e area y tres pa e grupo cu ta sinta aki tur atardi y fin di siman." Segun e titular di Integracion, Infraestructura y Medio Ambiente, esnan cu ta frecuente Flor de Oriente ta cabayeronan cu ta analisa y discuti tur tema, di politica, bida diario y asuntonan di nos pais. El a comenta cu frecuentemente, for di e grupo aki ta hopi idea ta sali cu ta yega te Gobierno pa ehecuta.

"Esaki ta e personanan cu ta acerca nos y bisa: 'corda traha riba esaki, wak esey, etc.' y nos ta aprecia tur e aporte aki," Minister Sevinger a bisa na e grupo cu a reuni diadomingo atardi

pa presencia e ceremonia di develo di borchí, aclareando ademas cu e espacio aki ta pa un y tur. "Nos por bin sinta aki, combersa, hunga domino, etc."

Finalmente e mandatario a expresa palabranan di pabien na famia de Freitas y specialmente na Sr. Pepi como tambe un pabien caluroso na e grupo social di amigo di Flor de Oriente invitando nan pa "Ban sigui hunto cu e tradicion aki." E Plenchi tin varios mata planta cu un bes nan bira grandi, lo duna hopi sombra na e area aki. Ta e intencion pa instala tambe luz y bankinan pa accentua mas su obhetivo di recreacion social. Pa loke ta e edificio di Corte y su anexo, nan ta den ultimo fase di acondicionamento interno cu muebles y transferencia di documentonan pa asina por inicia su operacion regular y habri oficialmente back na publico.